

प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
18.00 रविवार दिनांक 20.08.2017

पुलिस अधिकारी-बर्खास्त

छत्तीसगढ़ पुलिस ह एक ठिन बड़का फइसला लेवत बयालीस झिन पुलिस अधिकारी मन ल बर्खास्त कर देहे। ए जम्मा अधिकारी थानेदार, सब इंस्पेक्टर और एएसआई रैंक के हरय। ए फइसला नौकरी के दउरान खराब प्रदर्शन रिकार्ड ल देखत ले गेहे। जउन अफसर मन ल अनिवार्य सेवानिवृत्ति दे गेहे, ओमा पन्द्रह टीआई, नौ इंस्पेक्टर अउ अठारा झिन एएसआई सामिल हावय। पाछु दिन केन्द्र सरकार ह छत्तीसगढ़ के डीआईजी रैंक के दू झिन आईपीएस अधिकारी मन ल घलो अनिवार्य सेवानिवृत्ति दे रिहीस।

कृषि मंत्री-गौशाला

प्रदेस के कृषि अउ पशुपालन मंत्री बृजमोहन अग्रवाल ह पशु पालन विभाग के संचालक ले तीन दिन के भीतरी प्रदेसभर म चलत गौशाला मनके स्थिति उपर रिपोर्ट मांगे हे। श्री अग्रवाल ह ए दिन इजराइल के दउरा म हावय। ओमन फोन म ही निरदेस देवत दुर्ग के धमधा विकासखंड के ग्राम राजपुर म शगुन गौशाला, बेमेतरा जिला साजा विकासखंड के गांव गोडमर्गा म फूलचंद गौशाला अउ साजा क्षेत्र के ही गांव रानों म मयूरी गौशाला के बेवस्था ल तुरते दुरुस्त करे बर किहीन हे। ए गौशाला मन म हालेच म बड़ संख्या म गाय मनके मउत हगे रिहीस।

गाय मौत-कांग्रेस

इही बीच, धमधा के तीर राजपुर गांव म गौशाला म हाले के दिन म बड़ संख्या म गाय मनके मउत के मामला ल लेके आज कांग्रेस ह पदयात्रा निकालीस। ए पदयात्रा धमधा के पेण्डी गांव ले सुरु होके राजपुर स्थित गौशाला पहुंच के खतम होईस। एमा प्रदेस कांग्रेस अध्यक्ष भूपेश बघेल अउ पूर्व नेता प्रतिपक्ष रवीन्द्र चौबे समेत बड़ संख्या म कांग्रेस कार्यकर्ता मन सामिल होईन।

एखर पहिली, रायपुर म पत्रकार मन ले चरचा करत प्रदेस कांग्रेस अध्यक्ष भूपेश बघेल ह गाय मनके मउत के मामला म गौ-सेवा आयोग के अध्यक्ष अउ पशुपालन विभाग के मंत्री ल बर्खास्त करे के मांग करीन। ओमन किहीन कि कांग्रेस ह गाय मनके मउत ल लेके प्रदेसभर आंदोलन चलाही। उहें, चोबीस अगस्त के गउ हत्यारा मनके खिलाफ छत्तीसगढ़ के हरेक ब्लॉक, कस्बा अउ सहर म रैली निकाले जाही। एखर बाद अट्ठाईस अगस्त के बेमेतरा म जन आक्रोश रैली निकाले जाही। उहें, तीस अगस्त के रईपुर के तीर-तखार म हेल्ला जघा म किन्जरत मवेसी मन ल मुख्यमंत्री निवास तीर ढीले के ऐलान करे गेहे।

दूसर कोति, भाजपा के प्रदेस प्रवक्ता सच्चिदानंद उपासने ह किहीन कि गउ रक्षा के नाव म कांग्रेस ह राजनीति करत हे। ए गौशाला मामला म जउन भी मनखे दोषी होही ओखर खिलाफ कड़ा कार्रवाई राज्य सरकार ह करही।

अंतर्राष्ट्रीय गिरोह—खुलासा

रायपुर पुलिस ह इंटरनेट ल माध्यम बनाके करीबन तीन करोड़ रुपिया के ठगी करइया एक ठिन अंतर्राष्ट्रीय गिरोह के पर्दाफास करे हे। ए बारे म तीन झिन नाइजीरियाई नागरिक समेत छै झिन आरोपी ल गिरफ्तार करे गेहे। एखर मन तीर ले पांच ठिन लैपटॉप, तीस ठिन मोबाईल अउ करीबन चोबीस लाख रुपिया नगदी बरामद होय हे।

रईपुर के पुलिस अधीक्षक संजीव शुक्ला ह बतईन कि ए गिरोह लोगन मन ल फर्जी ई-मेल पठो के बड़का रासि कमीसन मन देके लालच देय के ठगी करत रिहीस। ए गिरोह ह विशाखापट्टनम, सूरत, नोयडा, राजकोट, समेत करीबन एक दर्जन जघा म लोगन मन ल ठगे के काम करे हे।

ग्राम सभा

राज्य के दस हजार नौ सौ इकहत्तर ग्राम पंचायत के करीबन बीस हजार गंवई मन म आज ले ग्राम सभा सुरु होगे हे। मुख्यमंत्री ह सबो पंच-सरपंच अउ गंवई के मनखे मन ल ग्राम सभा म भाग ले बर आरो देहे। डॉक्टर सिंह ह किहीन कि ग्राम पंचईत के सुधर कामकाज म ग्रामसभा के भारी महत्तम हे। जेमा गंवई के मनखे मन राज्य अउ केन्द्र सरकार के जम्मा जनकल्याणकारी योजना मनके बने ढंग ले समीक्षा घलो कर सकथे। ए परकार ले ग्राम सभा ह सरकारी योजना मनके जमीन लेखा-जोखा अउ सोसल ऑडिट करे के एक ठिन जोरदरहा मंच अउ मउका होथे।

ट्रेन-रद्द

मुजफ्फनगर के तीर उत्कल कलिंग एक्सप्रेस के एक्सीटेंड होय के सेती कई ठिन आने ट्रेन मन ल केंसिल करे गेहे।

रेलवे अधिकारी मन ले मिले जानकारी मुताबिक जउन ट्रेन मन ल केंसिल करे गेहे, ओमा हरिद्वार-पुरी अउ पुरी-हरिद्वार उत्कल एक्सप्रेस सामिल हावय। उहें, बाढ़ के सेती काली इक्कीस अगस्त के कामाख्या ले छूटइया कामाख्या-पुणे एक्सप्रेस ल घलो केंसिल कर दे गेहे।

राजीव गांधी-जयंती

राष्ट्र आज पूर्व प्रधानमंत्री राजीव गांधी ल उंखर तिहत्तरवां जयंती मउका म श्रद्धांजलि देवत हे। राजीव गांधी के समाधिस्थल वीरभूमि म जाके पूर्व राष्ट्रपति प्रणब मुखर्जी, कांग्रेस अध्यक्ष सोनिया गांधी, कांग्रेस उपाध्यक्ष राहुल गांधी ह अपन श्रद्धांजलि दीन।

पूर्व प्रधानमंत्री स्वर्गीय राजीव गांधी के जयंती के मउका म राष्ट्र बनाय म उंखर बड़का योगदान ल सुरता करत मुख्यमंत्री डॉक्टर रमन सिंह ह अपन विनम्र श्रद्धांजलि देहे।

विश्व रेडियो श्रोता दिवस

आज रेडियो श्रोता दिवस हरय। ए मउका म आज रईपुर म ओल्ड लिस्नर ग्रुप डहार ले एक ठिन कारीकरम राखे गे रिहीस। ए कारीकरम म माईपहुना छत्तीसगढ़ रेडियो श्रोता संघ के संरक्षक अउ अपेक्स बैंक के अध्यक्ष अशोक बजाज रिहीन।

पोला

खेती-किसानी अउ गरूआ-बइला के तिहार पोरा काली प्रदेशभर म खुसियाली के संग मनाय जाही। ए तिहार ह भादो महीना के अमाउस के दिन मनाए जाथे। अइसे माने जाथे कि पोला के तिहार गरूआ-बइला अउ खेती-किसानी ले जुड़े हावय। ए दिन म किसान मन अपन नांगर-बइला ल सुधर ढंग ले सजाके उंखर पूजा करथें। आज के दिन म बइला दउड़ घलो होथे। उहें, पोरा के दिन भांटा म चुकिया मन म ठेठरी-कुरमी अउ आने जिनीस राखके बेटी-माई मन पोरा पटके बर जाथे।
